



SASAR RAWAT 300 KILOGRAM SISA PERUBATAN SEJAM

Kualiti Alam Sdn Bhd, milik penuh Cenviro Sdn Bhd, menjangkakan Pusat Rawatan Sisa Klinikal (WTC) miliknya yang baharu dilancarkan, mampu memproses sehingga 300 Kilogram sisa perubatan sejam.

Ketua Pegawai Eksekutif Cenviro Khalid Bahsoon berkata sistem pembasmian kuman gelombang mikro pusat itu menggunakan tenaga elektrik secara minimum selain menyediakan penyelesaian mesra alam kepada syarikat bioperubatan dan berkaitan klinikal.

"Ia berteraskan teknologi tanpa sebarang pelepasan, tiada kesan memudaratkan, tidak menggunakan air, tiada wap, bau, pembakaran mahu pun asap.

"Sisa proses itu tidak bertindak balas secara kimia dengan bahan lain dan tempat pembuangannya juga sudah tersedia," katanya. Beliau berkata demikian kepada wartawan pada majlis pelancaran WTC di Sendayan, dekat sini yang disempurnakan Puteri Astrid dari Belgium.

Hadir sama, Pengerusi Cenviro Datuk Seri Ismail Shahudin dan wakil kerajaan Belgium termasuk Timbalan Perdana Menteri merangkap Menteri Luar dan Hal Ehwal Eropah Didier Reynders, Setiausaha Negara Bagi Perdagangan Luar Negara Pieter De Crem serta Duta Belgium ke Malaysia, Daniel Dargent.

Kemudahan lain Kualiti Alam iaitu loji pelupusan, loji rawatan sisa fizikal-kimia dan tempat pembuangan pepejal yang boleh menyimpan, merawat dan melupuskan lebih 100,000 tan metrik semua kelas sisa membahayakan, setahun.

Media : Sinar Harian

Date : November 24, 2014